

Songkok Stail Tun dapat sambutan

ALOR STAR: Bahang Aidilfitri semakin membara dan umat Islam rancak membuat persiapan dengan mengunjungi kompleks beli-belah.

Peniaga songkok dan pakaian di Kompleks Pekan Rabu di sini, Sardi Dahar, 46, dan isterinya Fatmawati Ali, 42, menawarkan songkok istimewa yang menerima ramai pengunjung ke kedai mereka sepanjang bulan ini.

Sardi adalah pembuat dan penjual songkok yang hasil ciptaannya digemari bekas Perdana Menteri, Tun Dr Mahathir Mohamad sehingga beliau menamakan songkok ciptaannya sebagai Stail PM.

Bagaimanapun, apabila Dr Mahathir mendapat gelaran Tun, Sardi menukar nama songkok berkenaan kepada jenama Stail Tun.

Sardi yang sudah 27 tahun terbabit dalam perniagaan songkok berkata, beliau membuat reka bentuk khas songkok itu bagi mengenang jasa Dr Mahathir sebagai negarawan tersohor.

Walaupun Dr Mahathir tidak lagi menjadi Perdana Menteri, katanya, songkok berkenaan yang saiznya lebih tinggi masih diminati masyarakat.

“Biasanya Dr Mahathir akan datang ke kedai ini jika beliau balik ke Alor Star,” katanya.

Sardi berkata, baru-baru ini, ada pelanggan yang pulang bercuti dari Paris ingin membeli songkok yang dipesan seorang kawannya yang masih berkursus di Paris.